




春樵隱士家稿

七十自壽集

十四

柳田文庫
文庫11
A1123
14



文庫11
1123
14



春樵隱士家稿卷之十四

湖西

琴

希聲廷調著

男

更改張玉佩錄

七十自壽集下

珊瑚篇序

珊瑚篇維何南海諸詩人之合集也詩集而名以珊瑚予知其采詩者褒其詩之美云爾乃今暢而說其餘事焉夫珊瑚南海之琛也世人之所貴而天之所秘惜也苟有人不取之則天何為縱而使出之其取之者誰是

七十自壽集下



必海邊漁者之類也。漁者能絞網出之，則珊瑚之出海固不得不待漁者之手也。雖然，漁者下民也，下民不得私取海琛，非有在上之人如鬱林太守者，縱之使取，雖身任珊瑚所萃之海邊，又將向何深潭施其鐵網，必坐視束手而已。何則？不得知已于在上之人也。嗚呼！吾人之采詩，亦何得不如取珊瑚之所為乎？夫采詩者采風也，本為在上人之任也。蓋在上之人求其下之有力于采取者，師之友之，吟詠譙游之餘，縱之使擇其佳者，則其於采風何難之有？予嘗與紀人池海莊善，其所居之

鄉曰栖原，其詩社曰古碧。昔年一游，此見土著個人之善詩，竊怪海灣山凹之僻境，天何闕箇詩運詩人之輩出如此。譬之海琛之所萃，可謂小鬱林也。令社親睦如兄如弟，亦可以比珊瑚交合之連理也。孰圖連理枝缺，煙霞盟寒，至零落無人，而餘一海莊耳。海莊厚于亡友，欲刻其遺詩而吊之，無復新友之可併刻者。况遭年歎，罹火災，世故多難，因循莫可如何，而送年月，蓋天未縱之歟。既而得一貴交，貴交非他田丸城主父野丹州刺史是也。為人好學，不耻下問，謂古之孔文子而可乎？位

為大國之上卿而下以海莊為師友是所謂得知已于
在上之人提綱之舉可從此始松平魯峰與佐野孤山
俱為世祿藩士蓋能手之作家也此輩與海莊結忘形
之交亦是詩運再興之奇瑞詎非天縱之時至乎於是
采詩之權專歸其手如為取珊瑚之漁者乃借珊瑚以
名篇開卷之首推刺史之詩謂之珊瑚之第一枝次則
魯孤二人之詩是為第二第三枝皆新出海之珊瑚肌
理軟膩者也呂柘廬以下一十四人之中予之所熟識
為垣已山為宮橋邨或池楓邨或僧梧溪皆已為古人

今采其詩不是新珊瑚枝有似舊菩提樹予聞珊瑚若
失時不取則蠹敗是其蠹敗者即今再發晶光于世不
亦幸甚乎茲擇新舊諸才詩合為一集公之于三都又
不異貢珊瑚之意也刻成而索序于予予竒其名珊瑚
暢說及此

成化琴記上

成化琴為成化間所造之古物也成化朱明憲宗之年
號也予獲此琴于薩摩一老人試問此琴從何處而出
經何處而來何其出於彼西何其止於我東何日飛越

而渡何人提携而至請聞其履歷緣由老人曰相傳蘓
州人陳翼善琴康熙二年從冊封使張學禮載此琴游
琉球授彈法于中山王子彌多羅王婿啞弗蘓三法司
子喀難敏達羅等迨其將歸以琴留遺王子此琴是也
予又讀龍威秘書中學禮使琉球記詳錄其事與老人
之所傳合焉然則康熙間陳翼自蘓州提携渡海也無
疑矣自明之成化至清之康熙其間凡經二百年而始
至琉球也琉球南海中小國而兩屬清朝與我薩侯琉
人獲之于清人薩人獲之于琉人琉物之波及于薩固

其常也但此琴不在薩之藩內而在海中之種子嶋未
知何年至自琉何故止于島中也叢爾孤島斷無解琴
者琴之止于此與沈淪無出世者無異焉先是島人平
伯敬每上都必來而訪予知予好琴又以姓琴故一日
袖琴縮圖示予曰僻島有一老人蓄這般琴云是明物
也而老人好蓄書畫而娛之琴則不知彈之又非其所
好或視為無用之物不如換書畫而娛焉琴亦以無知
已故不得展其聲音似可憫者譬之佳人未見君子苟
能嫁姓琴之君子應宜其家室吾願為媒灼令彼其之

予千里歸則何如予之好琴如蕩子之於女色一聞其言眉舞色飛因謂彼之所好者在我我之所好者在彼一換兩得物各值其良緣敝箴頗有古書畫任憑其揀擇以換之請子媒為伯敬諾而歸自此以後予心如委人買妾者未見其貌而先慕其名徒待彼美于天一方可謂痴亦甚矣哉既而有人來語曰頃日有古琴至自薩姦商等輻湊謀為奇貨價頗沸矣予聞而怪之急出圖徵之其人曰其長短如圖其銘印如畫其他瑣細式度悉皆與圖符合予不疑其即此琴只疑琴之所以

入都與所載之為何人未能審知之也予所任永昌坊有薩侯邸吏多相識乃就而謀之且請其糾察吏諾之過三二日而其實事始明矣琴之離鳴也從老人之出仕于本藩老臣某家琴之入都也由老人之後老臣某而入都琴將離薩在島伯敬為作媒約書以付老人老人入都之日為姦商等所要且餌以金遂秘伯敬書不致之于予迨為邸吏所糾責不得已持書來謝稽留之罪且告其實情請以換書畫為其名其實換以黃金予問琴之所在蚤已墮質庫矣從前伯敬之媒妁一敗而

無可繼彼此兩好之琴與書畫琴已如劃然絃斷書畫亦將有誰揀擇之勢不得不拋于晉人口諱言之阿堵物不亦然風景乎乃傾囊而不足另貸友人蓄積之餘始得償聘金以充我家之妻妾焉實為我天保辛丑十三年之事自彼成化丙戌十二年數之為歷三百七十八年月之古琴也琴有成化人之鐫銘及古墨蹟不併記于此姑待次篇而說之

成化琴記中

琴已服侍左右予寵愛之以充新買青衣將戲命其名軫池之下鐫萬壑秋聲四篆字則呼做秋聲琴而可也龍池中有大明成化丙戌新野知縣金臺趙淡造新安祁閭宋希僊藏之二十三字按彼成化丙戌正當我土御門朝文正元年為三百年前之古墨蹟諦審熟視竭目力裁可辨認之龍池與鳳足之間鐫萬古清兮之印影則又呼做清兮琴而可也鳳沼中亦有字但沼比池則隘不能辨其語至冠線龍齧之處以黃革包之面背數處有牛毛斷紋間雜蛇腹紋亦可以徵三百年之古矣既獲三百年之古琴始知三百年前有趙淡其人

宋希僊其人雖不知其何如人而亦知其精妙於琴事其琴與其名俱來自海外曰以為名琴呼做秋聲而寵之呼做清兮而愛之既知成化人而彈成化琴予心猶如代其人而彈之者又問其聲音則亦應不異當年其人之彈此琴者其人彈之於三百年之前予彈之於三百年之後予心亦猶如一堂連彈者又何分世之古今別海之內外之為夫彈琴者知音也知音者必在耳與心而目與手則次之親彈此古琴鼓其古音可不謂知音乎又取三百年之琴置之几案之上觀其銘印讀

其墨蹟而勾之挑之則目與手亦混合而附琴之面上身與几案亦相去其間不以尺是既無三百年之古矣雖然古之人逝去茫茫遙憶千萬里之外三百年之前何為知日本有姓琴字廷調者受持之乎古人留遺後人而後人受持之予亦將留遺後人不知後人其誰能受持之後人之不知予猶予之不知古人也而此琴常在予齋中又在予膝前不異青衣之侍側寵愛豈有已時若夫白太傅以琴為三友之一李建勳以為四友之一予則以充二青衣秋聲也清兮也一琴而二名二名

而一物也。凡物之在予側，豈能久在側乎？其在側者，暫時也。予亦未嘗不如古人逝去，若夫逝去則不知其再侍何人之側。今日予暫寵而愛之，後日誰又寵而愛之也？物固無心，而不解人語，一任為人所買，不顧舊主人而奔與新知，已乃是為無心之過，非不貞之罪也。只恐不肖之子孫，蔑視手澤之遺物，貪有高價以付姦商，無賴之手，予已懲于獲琴之前，豈可不懲于遺琴之後乎？予之有慮于此，真是佛氏所謂執着縱死猶能可嘆。眼于泉臺矣，乃有發願心願，取萬壑秋聲四字，建立永

世不毀之一法焉。問其法維何，曰：擇萬壑之中清兮之境，而蓄此琴焉。此是世間污慾爭競者之所不企及，堪可使天然秋聲不斷于萬古矣。天之有四時，秋為忘熱之時，熱者慾也，爭競之氣也。時至秋，則污熱之氣消，清虛之聲生，秋聲即是天地之虛聲，非人間之熱聲。莊叟謂之天籟，凡聲之神妙莫神妙於此聲也。自今蓄琴于此境，是托包括于天也。雖有慾者欲從之，未由已。予亦安心有餘，而得無所顧慮於逝去之後。此為蓄琴之第一義。請聽下篇之說。盡上篇說獲琴之緣起，下篇說蓄

琴之結願此篇為承上起下之轉捩也

成化琴記下

琴之為物古物為貴也貴古物者貴古代也琴之為用問其大者堯舜禹湯文武諸聖人冲融治化之物事也問其小者師曠伯牙司馬相如陶淵明諸隱者蕩滌胸衿之物事也絲桐之微妙無大無小莫若貴古物也古物之難獲也久矣生於今之世而求古之物况於在我東而待之彼西者乎若夫周漢晉唐宋元之物斷而無有之苟得有之雖曰明物猶足為古宜貴之以為希有

之物為昔則蘓東坡獲雷氏琴以為珍藏則唐琴之希有于宋代可以卜也遠在彼其邦而猶然詎圖近在我也此邦則南都東大寺庫所藏之琴蓋為唐以上之物自聖武朝至今存焉惟當時遣唐使留學生等裝載歸朝者歟不獨有此琴而已法隆寺庫亦傳一唐琴琴池中有開元十二年云云之八字則所謂雷氏琴也按開元十二年當我神龜元年亦當為聖武朝遺寶也謹惟我邦古之天子用琴於樂府古琴之傳于今者皆天子之樂器也應神朝以官船枯野餘材造琴

事見于日本紀是為天子用琴之濫觴也 同朝海外
伶工多歸化樂亦興于此在海外當晉太康末年是為
周漢遺音傳于我之權輿也既而至豐聰太子時樂制
極大成矣因按太子攝政通聘海外當隋開皇年間惟
伶工輩奉令往學海外受彼周漢遺音傳在陳隋之世
者而琴固為堂上樂即是諸聖人冲融治化之遺意所
謂琴之大者也後世琴之彈法絕廢伶工亦莫有所稽
考可惜琴之大者徒為古刹之佛物是似今大者為小
者也然以其為佛物故得其傳來無恙苟在隱者之家

其見掠且奪有誰肯守焉近古有其事驗石川丈山蓄
明人陳繼儒琴是為隱者蕩滌胸衿之翫物也丈山死
後遺在詩仙堂而今所在者為新造偽琴然其以有明
琴之名世人或知貴之不知其真物夙已見掠奪換以
偽物是雖非其大者亦可惜也予亦隱者而所蓄之成
化琴亦同明物視之嘉靖之物則更古矣苟倣丈山遺
之無絃庵其不見掠奪者幾希噫何如是可莫若倣佛
物而為神物藏之名山也名山非他我嶽廟神庫是也
爰稽自家系譜始祖為琴御館宇志麻呂仕 迨江朝

奉勅掌嶽廟祭祀是補祝職也曰職賜氏與姓曰祝部宿禰世世奉之而琴御館三字為其族也相傳始祖時有靈琴一張每鳴館中其音聲能應國家之休咎庶民驗福極于靈琴仰稱琴之御館云十有餘年一族四家欽戴三字以為祝氏之本族予以謂氏族混同彼此互用者本邦中世之通例也又以謂祝之為氏屬職琴之為族屬身此身辭職乃措氏換族另裁姓琴一字以顯為琴家之遠裔也既而獲此古琴不亦琴家之奇緣乎今納此琴以充神庫之大寶是令其小者為其大

者其古者亦更古矣願得嶽神七廟之護持力傳之遠而彌靈歷之久而愈神是希聲之所禱告也又告當職同族守庫之人人請莫使有掠奪請莫使有換偽非一家一人之司守為四家合守之神物矣更請我家之子或孫爾家之子或孫其有好琴如予者感予納庫之心有時追遠一彈予又所不能不待之于後世也因書此以付第三品希烈姪四品希興及兒改絃更張等永矢勿護

永昌回祿記

弘化丙午閏五月十九日予所住永昌坊有四祿之變
焉黃昏火起于京極街金蓮寺俗曰道場寺裏常有諸賣肆
諸扮戲之類皆已焚盡南隣為祇園寺亦用迎神祭
祀之處火徙而焚盡於是火勢倍熾越京極街而西以
永昌坊為火之正路又北燃而西或南燃而西北為錦
巷南為綾巷錦巷隻餘右側綾巷雙焚左右火脚之所
延緩于北而急于南殆將及佛光巷雖東風不甚急火
皆西而不及越御幸麩屋富路柳場左界之五街至高
倉街而止豎橫如碁局四顧一焚無有所遺凡所焚盡

千有餘戶至於屋後之有矮屋宅裏之有比舍其數不
可勝記實為天明大火以後之所無也予是日與善琴
僧雪堂聯彈竟日彈罷作蕎麵共酌忽見數點火片如
螢如露自空中飛墜于窓前之芭蕉葉上為燦之被風
飄者又西隣有土庫粉壁晝明先于月之未升驚日間
家人忙報有火咫尺雪堂吐哺擲匕而歸去予亦出門
東望則赫光猛烈燄燄燒天勢將漸西隣人等曰火氣
雖猛則猛救火數隊皆已輻湊何防禦是艱况相隔數
街又何慮延及于此耶須臾爆爆刮刮飛標箭至少年

壯者之往觀火者恐怖而歸紛紛老穉之舉家避火者
脫險而來門前街頭人填而無隙地於是前謂決不延
及者各自謀逃避恰如驚鳥之不顧巢也先是親戚門
生或識面之徒聞火之近予所居往往馳臻諸貴族縉
紳亦皆遣使來問安否特我王門重臣筑後守成澄
及某某竊奉王命來問率以下吏下卒數十輩愚姪
陸與守希與住嶽麓頃日滯都下亦幸來會皆勸予令
與家眷先遁去曰有一輩之在宜料理後事也予曰琴
老人家無長物諸詩草諸文稿亦願使祝融氏藏拙但

笛古琴僻愛優妾齋去則足矣乃囊之匣之稠人堆中
予與童僕俱護衛遁在無漏街一商家家眷老少從焉
予去後衆指麾役卒搬出所有家物于他各上空屋
上觀火迨來越高倉街棄而馳去聚于予之所遁告曰
必之焚盡既而無漏街亦慮火來家家堅閉土庫人人
謀議移徙予又不能安止天將明更徙在堀河以西一
醫家家有高樓宜觀火是時日上三竿不辨日光耶火
光耶審視煙婉之所向與火脚之所延則倍西而已
因以謂高倉以東皆高賈防禦或踈西則不然北有薩

摩邱南有安藝阿波鍋島諸邱武吏之所守衛定能防禦之又有堀河之橫前火脚恐不能及于此姑借榻而睡焉有詩見于上卷睡覺則急鐘撞罷騰煙畧歛親戚門生等來報曰火踰高倉街幸而止於豪商某家先生家無恙可賀之至也主人亦設酒賀之迨晡時而歸餘燼殘炎猶未銷滅所居亦前夜忙擾之跡荒如廢宅灑掃室內撤反在外之諸雜物井濁不可飲竈壞無可炊深井塗竈經數日方纔得復舊安息焉既有語火之所以延蔓者曰救火役卒本皆無賴惡漢有火則有用無火則

無事游手賭博每往來街衢叩商賈家乞貸酒資與者以為恩人不與則恨以為仇當火之起救與不救一係于恩仇二者有火之及恩家皆為竭力而救之若夫仇家不唯不相救而已束手立視或引火而迨之自以為快惡孰甚焉又當火之所向有豪家之可獲奇貨者偷批其賄物豪家亦偷擲金錢以謀免燒亡彼得金而賣身此失金而買家俱是火中忙裏之秘事也凡尋常街衢之有火延燒太少不過三四五或十戶而熄焉工于救手也但如值花街柳陌之有火則戶數必夥焉其故

何哉豪華奢侈之地薄情俳優之徒其被燒而苦渠輩
見而快之游手翫火不救以其力也永昌坊之繁華甲
于都下而今類燒延蔓至如此之大蓋為救手所翫亦
未可知也或說防火之術各有其異曰夫錦巷之火脚
止于薩摩邸薩人之武勇甚於火烈其以武力戡之固
宜矣綾巷之火脚動輒將南而西止于佛光寺之前聞
在南方救火者為伏水監司之所遣多是匠人木工各
手石椎鐵鋸之類隨火之所向預毀未焚之家以救將
燃之家匠本業造營故毀推亦殊敏隔斷火路遏止火

脚亦是一術是夜不令火南者伏水匠力居多云佛光
大利也此利如燒雖東而本願二大利亦難謂不危佛
光已危無數所化僧來自本願學寮一心一向不雜他
力而防禦終得無恙豈曰非佛力乎獨怪南北之中間
永昌坊裏之豪商不知有何力何術而防如斯之大火
耶蓋金力也聞賄以數百金令救火人等感恩出金剛
力夷滅祝融氏焉此術無匹不在費力而在費金也予
聞以水防火未聞以金禦火火本克金金今克火奇奇
怪怪不覺失笑予所居與豪商僅隔三四戶渠如不出

金茅廬必罹火網火豈為彈琴人而熄者耶

鴨河洪水記

弘化丙午七月七日風雨大起至暮不歇樹竹折倒屋瓦飛墜入夜益烈常年是夕牛女佳期乞巧之兒女揭竿燈歌呼喧嚷徘徊街衢謂之祭星也今茲

仁孝天皇崩更有國母皇太后之喪十萬戶內過密八音况風雨如斯連街無人聲編戶悉閉至夜之深忽聞有波濤之雜在風雨中或者鴨河之水暴漲乎明則八日雨歇風不歇而夜來所聞之聲猶未離耳又聞街

頭語咸曰大水也是日兒改絃偶有事于我廣福王府不得不趨蹌夙起而出將踰第五橋橋腹中斷水方過橋腰北顧第三橋亦是中斷而其斷壞大於五橋俱不得踰而反夫三五之兩橋治平百年無有斷壞之患蓋延寶二年三橋一壞同四年三五橋俱壞事見于國史惟當時兩橋非如今日之壯大堅固也鴨河之有源自京城之北嶽分派而流一為鴨水一為鷹水形如燕尾迨至糺林二水合流姑名曰今出川而下亘于六七條總名曰鴨河常水之淺深有時變異洲渚處處假架

小橋容易踰渡不必待三五之兩橋若夫梅雨連朝秋霖積日大水暴流則皆撤假橋只有兩橋而已今年之出水不同于常年實為天變矣傳說城北貴船嶽崩圯出此大水俗謂之山潮有物自內突出俗謂之螺見焉或曰螺海物也無出自山之理俗稱螺見非螺也蛟也說文所謂龍之屬也蓋蛟龍潛匿巖谷借風雨之勢而見焉見則必大水出焉予按螺與贏同山海經曰槐江之山丘時之水出焉其中多贏母則或出于山亦未可為無謂也是日也嶽中震動大石趾輕大木根拔山村

民家破碎而流去者數十戶間有村寺之佛堂棟桷堅固倒而不破碎者動搖滾滾浮水上而流恰如數十丈樓船也先是三橋下之水與橋板相距不盈尺佛堂之至于此絀而不流大水自後超越而上數尋是橋柱之所以不能支而斷且壞也意五橋中斷亦同然歟又有傳怪者半夜立河上矚之有大物如蛇龍正自上流宛轉而下長八九間許有時盤做一堆如大牛翹首之狀左盤右旋而下前所謂自貴船突出蓋是歟兩橋之斷壞亦當為之所衝破云予說不知孰是兩橋上之往來

絡繹于晝夜是夜傘子雨衣馳且走蹈橋之中央覆溺者不知其有幾間有見橋板之斷驚愕反走以得免者適有一商溺而不沒踊躍于逆浪上自三橋至松原望前有岸而上得免而還其壯可驚嘆也兩橋斷之後東西兩岸相阻咫尺可相喚而不可相踰是夜東人之在西無由將東西人之在東亦然鴨河之東南為我王門之所在五橋為王駕朝天之常路而今如斯雖有奔趨大喪之事不得不待水退橋成也况不日皇太后葬車之所過百官公卿亦皆徒跣而從

焉則此橋豈修覆之所可緩乎若夫三橋則五十三驛之咽喉通關東之要路也適自霸府所遣之急使乘傳而至臨河而窮官吏數輩立西岸而迎之水勢迅烈不可涉又不可桴驅使屠兒乞者之類數十人結隊馮河以得通東信焉其他有公事之告急作書繫之于箭射而致之又有非類之徒狡獪射利為豪醫富商所雇偷馮而達一書得價錢十有五鎰云經三日水少減方纔用舟三雙始足代渡橋鴨河之容舟古來蓋未曾有也予為致仕之隱者聞有大水懶一往觀偶為家僕等

所強，但試出門游視，凡京極街東率皆罹水患，高瀨以東殊甚。人家凡百，雜具前日所搬出，猶是羅列路之左右。所踏泥濘狼籍，非褰裳則不能往來。其間人或戴笠披蓑者，理泥滌穢而不已。着履觀水者，亦肩相摩焉。予老腳踏跚，纔使僕扶手，始能臨河岸。寓目焉，是日雖太半減退，而水色猶濁，泛濫逼岸，勢不可邇。周覽河岸，則多少人家壁破扉碎，井邊竈畔或卧牀下，所填之土泥亦無所除。遣酒肆肉店或娼樓，亦皆輟業。灑掃室屋，一且避水。他徙者各爾來治泥沙，以謀復歸。往月罹大火

家為烏有，寄寓此間。今復為洪水所驅逐，狼狽失措者多。有之云：凡城北上流之洪荒，姑措而不問。今出川以南之河西上，自三樹樓下至六七條河原東，則自柝樹岸沙川堤或銅駝巷下至我王門封疆之地，家皆如在水中。人將與魚為伍，豈可不謂洪水乎？自古鴨河之為害，譬之于叡嶽僧之為暴。白河天皇詔所謂不如朕意者也。惟當時亂世，嶽僧動輒出兵，其難防禦比之河水，滔天又職原鈔載防鴨河使一員，則可以想其多水患也。自神君定霸以來

昇平二百有餘年于茲僧兵不前河水無患不圖今日
之有水害實可謂非常之天變哉方今 上在諒闇
又重以 大喪下民之罹災于火于水回祿玄冥肆
行其虐不亦都下之大厄乎仰願在 朝變理陰陽之
諸君子勿外本內未有失所以奉若天命傳曰德本也
豈可不脩德而以戡之耶

忠臣末楠公歸釋碑銘并序

從四位下左馬頭楠公諱正儀河內金剛山西人父為
贈正三位左近衛中將諱正成兄為正四位下檢非違

使兼河內守諱正行正行之弟二人長曰正時公為其
次也延元元年父中將戰死于湊川正平二年兄河內
守與弟正時俱死于四條畷河內守有子曰多門丸先
天於是公當家而不怠于勤王運籌決策捍禦強敵多
所不讓兄河州世謂之三楠三世之忠臣也而父之終
于湊川兄之終于四條畷天下人人之所共知也獨公
之末路莫知其終于何處似有始無終者蓋史策散逸
無復可考證歟世之昧者或謂豎降旗而駁之或謂免
頭盤而嘲之噫是何言耶又有何確證而云爾耶予疑

其附會者久矣爰讀攝之草川三番村寺系譜其開基
第一祖為公之所歸釋其第二祖為嫡男多門丸與父
俱歸釋者所以多門二字為山號譜曰楠氏世為嫡男
者通稱祖父中將幼字河內守及其子皆同公以繼兄
當家故其嫡男亦襲其通稱云又曰正平十七年王
師北伐公為先鋒陣于鳥羽光明寺不利而退有僧正
覺者說公以南祚之難支為言勸公歸釋遁世予按
夢窓和尚謚曰正覺則可知其為夢窓而其為足利氏
之說客亦未可知也尋而值善如上人之教化遂為其

弟子法諱曰定專多門丸亦從而削髮法諱曰淨專云
由此視之公之所終不在斯寺而何耶從前之所疑判
然冰釋矣乃序其譜云云公之有別見深慮焉夫歸釋
遁世當時勇士之常也前有萬里小路藤房後有兒島
備後守高德凡史曰不知所終者率皆歸釋遁世豈唯
公一人而已獨公之歸釋實有所慮存焉父兄之所未
有慮而公之始有所慮也予以是知三楠之所為有異
同而無優劣矣夫二楠之死義殉節皆以潔身耀名為
其榮不遑慮其後實為勇且忠者其忠勇雖興起百世

之下而無益于輔當時之南祚苟無益于輔當時則
殺身與歸釋亦何擇焉丈夫之處世知天測時又能慮
後事是其要也古之三仁各異豈唯殺身以成仁而已
南朝微弱北賊大振天厭南德時未可滅北後事亦
不可不慮焉至其力竭勢窮不可如何之時則雖為諸
葛武侯恐不能顯補天之力也惟當時武侯之心定知
吳魏之未可滅而猶且出師上表者蓋告而終其忠勇
焉武侯幸不天假之年死而後已之言似有其驗如不
幸而其身不死其師倍不利則其將殺身以酬三顧之

恩乎又將為最初之卧龍而隱乎是亦非明所能逆觀
也惟公之陣于光明寺亦不異于武侯之出師公之為
儒將如武侯則宜上表以告其終也公之不告而歸釋
釋氏所謂因緣也勝敗進退之事已屬過去之一夢遁
世菩提之心即入未來之本覺焉世之議者唯以不似
父兄同死千古盡為不平但知不死之可憾而不知不
死之不可憾皆淺見一偏之論也予獨謂死不死之別
不在其人之忠與不忠而在其天與時之宜與不宜四
者宜畧其跡而原其心以鑒焉苟以一死為其榮則從

前當多宜死之時不死于宜死之時死于雖死無益之時豈有益于輔當時耶王師殆燼官軍土潰賊之屬目為鵠唯公一人而已公苟犯天與時倍戰而不已則不唯賊不可滅而已南祚之不偏安危窮立亡豈有後後來皇紆歸一干戈稍靖之天幸乎公歸釋而後和議行和議行而後神器還洛則公之緩戰于此亦不為無益于輔當時也且歸釋遁世藤房高德輩皆不知其所終公則明終于此公妻實子血脉相續之寺是其謀子孫實固而世父兄之忠寔久矣在釋氏則以為

吊父兄之菩提以我儒視之亦是為不異孝悌之道也蓋公之忠與孝隱伏于深慮而不譏耀于外觀非昧者之所得知也昧者或以不知其所終故妄議謂豎降旗謂免頭蓋噫謬矣予明知其所終矣烏可以降一字目之哉因解嘲曰非豎降旗也建法旆也頭蓋非法器為歸釋不用之物免則免矣換以袈裟矣予讀水史深寃公之入犯順不臣之列因首題忠臣二字而在祖為公之子二人兄曰正勝系譜所謂多門丸與父俱歸釋弟曰正元凜凜守義和議既行後猶且單身入京竊謀刺

足利氏身已被縛口猶大聲罵賊眼光如電亦是忠勇
所謂殺身以成仁者也刑日就地坐會天龍老和尚率
普明龍湫二禪侶過三條河原囚見之謂監刑吏曰願
迎那和尚問末期一着而死吏聽之和尚機鋒峭峻秉
拂于刑人場囚有白刃臨頭時如何之問和尚答以上
無攀仰下絕已躬之古句喝一聲則囚已見刎云云見
于天龍寺古記按單稱和尚而不名所謂夢窓歟又別
有一智識在而然歟二禪侶皆為夢窓之法嗣也近時
高松侯所撰歷朝要記亦載此逸事雖有大同小異俱

足補水史之多疎漏亦足以徵歸釋之父而非叛降之
臣矣凡為人之子孰不欲追其父之心志有其父降賊
而其子罵賊是為子罵其父也子而罵父豈有此理罵
賊甘刑亦是為終其忠勇也然臨終之一參禪畧有似
追父之歸釋者亦不可謂斷無釋緣也迨歸釋碑成併
記其事焉銘曰

一楠歸釋二楠死常死與不死本來無別以此觀公豈
有所劣惜哉史筆道聽途說簡編所載入辱人列可憫
宿冤何時一雪茲知所終為立碑碣公妻實子縣縣瓜

未幾宏化隨從大善寺堯童貧寺無人書則承薪汲水
苦勤不異奴僕夜則就佛燈閱書油不竭則不輟可謂
僧中之匡衡也安永間年甫二十一打包離國遠躋豐
嶽之學寮留學三年歸住一小庵而未以為足再躋嶽
侍快雲僧正遍訪諸尊宿叩密藏與旨傍涉華嚴天台
三論唯識之學前後十二年捆載還鄉住持賢法山塔
頭威德院寬政享和文化之間遷住荻原山及清龍寺
及禪師峯寺及青龍寺及金剛頂寺遂陞任賢法山主
凡歷任諸官利皆莫非國侯命也賢法之為山在高智

城西與城東之五臺山俱為國侯祈願道場國中之兩
望利也自非學德練磨歷任諸利者輒不得執其法柄
焉師自為主鳴大法鼓指麾雲徒殆迨八年義學大振
焉既而齡逼古稀厭事務頻繁將上書辭職官吏某氏
掌神祠佛宇俗曰寺社奉行固挹師高德聞其將辭即
來謁苦留曰為國也為法也縱令上書下官不肯奏請
緩數年師不得已又住三年矣一日門下諸宿請傳醍
醐一流之法師微笑曰惜而不傳犯滅法罪不秘謾
傳亦越法罪也而今機熟衲亦何憚焉於是傳法事竣

本懷始伸如身釋重負者也有既廢之寺址在賢法之
坤隅曰法僊師捐貲建之隱遁于此後法嗣榮翁構丈
室於月洞山而邀之喜其美景欣然棄去法僊座右諸
玩具無有一所齋手拖藜杖口占片石孤雲閑日月三
衣一鉢澹生涯之一聯蓋殘生之清娛無我無慾之菩
薩眉可以想像也文政十四年癸卯七月七日如睡長
徂享年九十三葬於月洞山焉師為人謹肅臨事果毅
自幼甘艱苦歷住官利賜俸有餘而自奉儉素然至救
人之窮乏或脩飾神祠或莊嚴佛宇則毫無顧惜一旦

退職大傾囊底施諸貧僧或寄附先師俗父母資福之
寺院又永代法華會之供料准頂法器之補闕其費財
不可勝計也著書且自它注解若干部有龍臺稿若干
卷晚年以阿字觀為日課又入文墨三昧或臨古法帖
自解嘲曰老而還童塗鴉唔呶可自此而始也其學而
不厭樂而忘老太率如此惟往歲寄書于予質問詩文
蓋斯時歟予之目以非常豈唯此等之事而已初方師
之住威德院北經僻邑之頑民值年凶歉憤已凍饑致
怨于官披篲戴笠手鎌鑿及烏銃鑿起于此于彼離去

國疆雲屯于豫之管生山號七百五十人郡吏傳令諭
之不服官謀議所以服議歸令沙門有寸德者往諭而
師膺其撰詣官曰黨必有元謀可誅者誓勿用斧鉞則
奉命為官議聽之即往百方諭之遂服乃率衆于疆是
時疾風迅雷猛雨傾盆師令衆脫笠跪伏謂吏曰頑民
無禮而今知罪願休束縛願休誅殺更願使臣僧珠數
連串七百五十人首救入頭陀袋裡狂乞寬宥吏亦服
其言而止嗚呼是非常之大功德也嘗聞釋氏尚無為
是豈無為乎忠乎上而慈乎下之所為明為國家之大

用則師之所為即是與我聖賢之深旨異道同揆夫如
斯釋亦儒也雖吾儒而不得不榮羨之也若夫世之常
僧推魯老瘦與草木俱腐無事之可誌者殆比比也今
也師塔成予深薰其德大快其所為而銘之銘曰
振廣曠舌口論不啞開頭陀囊攝取不捨護起之民皆
被包裹德能服彼師本無我忠恕慈悲忠上慈下流沙
洙泗同源分瀉非常是常佛即儒者孔孟道數菩薩心
也

春樵隱士家稿卷之十四終

書自壽集後

此集名曰自壽以其成於古稀之歲也先生七十生辰設饗於東山有來獻壽觴者數百人又寄贈詩文或書畫者幾至數千幅和風煦日滿樓瑞煙披拂薰蒸則先生之飽禎祥宜目倦耳疲口亦慵言之而猶有煩自壽乎需竊以謂他之壽先生不過祝其壽之愈長而愈久也先生之自壽非期其壽之長久而期此集之亘數百年不可磨滅也先生好新奇文文不新奇則不喜試問寄贈數千幅中有其新奇可喜者乎否安知其無先生

之目倦耳疲口亦慵言之乎此集不襲古人不同今世
唱一家之新奇擅擢于今日然而身非金石不能骸立
肉視於數百年之久則弗得不託諸黎棗是乃此集之
所以可自壽歟頃日刺成需持此言質之先生先生似
有怒於言色曰子之目予也深矣予文輕淺豈如子言
乎子何以曰新何以曰奇予也非不襲古人之文字而
新之非不同今人之性情而奇之僅新予筆墨奇予揮
手而自戲也譬如滌硯而作字不濡以隔宿之墨耳請
子淺目予勿有深目予也予集與他集異自家已身之

集也刺則刺矣刺以傳子孫而足不欲公之于世謀長
久不窮焉然有一說于此予家千年縣縣于今自今以
往經數百年亦當如是則集之不磨滅予不卜而知矣
不唯集之壽如是而已他之壽予數千幅一入自家之
文庫則永久無散逸之慮是予之所以壽已併壽他之
意矣說畢而一笑需誤深目先生却被先生淺說破之
然聽其說殆有悟於作友之道願自此滌硯而試墨焉
嘉永己酉夏六月

先生行年七十二文與齒老體與筆健嚮先生所作世
或非之而先生有別見確乎不遷今也先生名重于海
內海內翕然注目近時都下之無人諸老儒皆卽地先
生獨壽惟先生之精神即邦家之元氣天使一老把握
文柄獨步寥寥之世界然則先生今日之壽謂之今日
斯文之壽其孰曰不然今茲文集第七編刻成命曰自
壽夫人生七十古所為希先生自壽固宜雖然其壽果
係乎今日斯文之氣運則人人皆將壽先生而先生自
以為一家之壽何哉先生英邁孤潔不求知己于世蓋

世之可求之人也知先生者唯先生而世之所是非任
其所是非而可也迺知皆壽與自壽亦固置之不問只
是室內乾淨几席端正自如至夜誦讀之聲不斷數十
年間如一日所為大抵去污來清省煩就簡間或繙詩
囊開琴匣以收煙花風月之聲光宜其為文章而煥發
焉是先生之所以有神仙之樂而長生養壽亦宜哉
嘉永己酉秋八月

近江 大冢紳撰

Vertical columns of handwritten Chinese text, likely bleed-through from the reverse side of the page. The text is arranged in approximately 12 columns, with a large, faint character visible in the center-right area.

010190523190

